

DOG nº 36, 20 de febreiro de 2001

**Decreto 45-2001 de 1 de febreiro de refundición da normativa en materia do Camiño de Santiago.**

Na exposición de motivos da Lei 3/1996, do 10 de maio, de protección dos camiños de Santiago, xa se recoñecía a existencia dunha abundante lexislación dispersa e de carácter regulamentario sobre o Camiño e foi a necesidade dunha lexislación integradora de máximo rango a que xerou a promulgación da dita lei.

Faciase preciso, xa que logo, trasladar ó eido regulamentario ese espírito integrador co obxecto de que a estrutura organizativa disposta pola Xunta de Galicia para dar satisfacción ó mandado do lexislador de promoción do coñecemento e difusión do patrimonio histórico-cultural ligado ó Camiño de Santiago tivese un axeitado desenvolvemento.

Deste xeito establécese no capítulo I o Comité Internacional de Expertos do Camiño de Santiago, constituído por persoas de prestixio internacional e recoñecida competencia no campo da investigación, promoción e difusión do Camiño de Santiago, como órgano de colaboración coa Consellería Cultura, Comunicación Social e Turismo, a cal dirixirá e coordinará as súas actuacións nesta materia a través da Subdirección da Xerencia de Promoción do Camiño de Santiago, unidade á que se dedica o capítulo II, contando tamén para esta tarefa coa empresa de capital público en forma de sociedade anónima recollida no capítulo III, S.A. de Xestión do Plan Xacobeo.

Como mecanismos de actuación axeitados para desenvolve-las competencias asignadas establécense nos capítulos IV ó VI o Rexistro de Entidades de Promoción do Camiño de Santiago, o procedemento para a declaración de interese para a promoción do Camiño de Santiago a todas aquelas actividades e proxectos que contribúan efectivamente á promoción del e, finalmente, as normas de utilización dos albergues da rede pública.

En definitiva, refúndese no presente decreto a seguinte normativa:

-Decreto 344/1992, do 26 de novembro, polo que se establecen as normas de utilización da rede de albergues previstas no Plan Xacobeo.

-Orde do 30 de marzo de 1993 pola que se fai pública a rede de albergues do Camiño de Santiago no ámbito territorial da Comunidade Autónoma de Galicia, procedéndose á súa actualización.

-Decreto 224/1994, do 2 de xuño, polo que se crea o Rexistro de Entidades de Promoción do Camiño de Santiago, agás o seu artigo 1.

-Decreto 245/1994, do 23 de xuño, polo que se regula o procedemento para que determinadas actividades e proxectos obteñan a declaración de interese para a promoción do Camiño de Santiago.

-Decreto 169/1994, do 2 de xuño, polo que se crea o Comité Internacional de Expertos do Camiño de Santiago, agás o seu artigo 1, e o Decreto 325/1996, do 26 de xullo, polo que se modifica o anterior.

-Orde do 21 de xaneiro de 1995, pola que se aproba o Regulamento de funcionamento e réxime interior do Comité Internacional de Expertos do Camiño de Santiago.

Por todo isto é polo que, por proposta do conselleiro de Cultura, Comunicación Social e Turismo e logo da deliberación do Consello da Xunta de Galicia na súa reunión do día un de febreiro de dous mil un,

## **DISPOÑO:**

### **Capítulo I. Comité Internacional de Expertos do Camiño de Santiago.**

#### **Sección primeira: Finalidade, composición e funcións.**

##### **Artigo 1º.-Finalidade.**

O Comité de Expertos do Camiño de Santiago é o órgano de colaboración da consellería competente no relativo ó Camiño de Santiago, nas cuestións que se lle presenten en relación a ese ben, patrimonio da humanidade.

##### **Artigo 2º.-Composición.**

**1.** O comité estará formado por:

**a)** Nove vocais, designados polo conselleiro que teña atribuídas as competencias relativas ó Camiño de Santiago, entre persoas de prestixio internacional e recoñecida competencia no campo da investigación, promoción e difusión do Camiño de Santiago.

**b)** Un secretario, que será o xerente de promoción do Camiño de Santiago.

**2.** O presidente será elixido polos vocais do comité entre os seus membros.

**3.** Tamén haberá un vicepresidente que será elixido por maioría simple dos seus membros.

**4.** O cargo de membro do comité non será remunerado.

##### **Artigo 3º.-Funcións.**

Son funcións do comité:

**a)** A análise e investigación dos temas directamente relacionados co Camiño de Santiago.

**b)** O fomento e publicacións sobre temas xacobeos.

**c)** A organización de xornadas, congresos, seminarios e simposios que acorde a consellería competente no referente ó Camiño de Santiago, coa finalidade de estudar e promocionar internacionalmente o Camiño de Santiago.

## **Sección segunda: Sede e normas de funcionamento interno.**

### **Artigo 4º.-Domicilio.**

O domicilio do comité fíxase para tódolos efectos na Xerencia de Promoción do Camiño de Santiago da consellería competente na materia.

### **Artigo 5º.-Representación.**

A representación oficial do comité soamente poderá ser exercida polo presidente. No caso de vacante, ausencia, enfermidade ou outra causa legal, o presidente será substituído polo vicepresidente do comité.

### **Artigo 6º.-Funcións do presidente.**

Correspóndelle ó presidente:

- a)** Acorda-la convocatoria das sesións ordinarias e extraordinarias e fixa-la orde do día.
- b)** Presidi-las sesións e modera-los debates.
- c)** Dirimi-los empates co seu voto de calidade.
- d)** Exercer tódalas funcións inherentes á condición de presidente do comité.

### **Artigo 7º.-Funcións dos vocais do comité.**

Correspóndelles ós vocais do comité:

- a)** Recibi-la convocatoria da reunión, acompañada da orde do día, podendo introducir propostas de temas para a súa inclusión nela, se ben a documentación deberá estar en poder da secretaría do comité cinco días antes de cada sesión.
- b)** Participar nos debates das sesións exercendo o seu dereito ó voto e expresando o sentido deste, de modo xustificado.
- c)** Formular rogos e preguntas.
- d)** Obte-la información necesaria para o desenvolvemento da súa función.
- e)** Exerce-las demais funcións que sexan inherentes á súa condición.

\*As funcións inherentes á condición de vocal do comité son indelegables.

### **Artigo 8º.-Funcións do secretario.**

Ó secretario correspóndelle:

- a)** Asistir ás reunións con voz, pero sen voto.
- b)** Efectua-la convocatoria das sesións por orde do presidente e cita-los seus

membros.

**c)** Recibi-los actos de comunicación, notificacións, peticións de datos, rectificacións ou calquera outra clase de escritos dos que teña coñecemento.

**d)** Redacta-las actas das sesións e despacho de asuntos.

**e)** Expedir certificacións das consultas ou dos acordos.

**f)** As demais funcións que lle sexan inherentes á súa condición de secretario.

### **Artigo 9º.-Quórum de constitución do comité.**

Para a válida constitución do comité para efectos de celebración das sesións en primeira convocatoria requirirase a presenza da metade dos seus membros e do presidente e secretario ou persoas que os substitúan, en todo caso.

De non poderen reunirse en primeira convocatoria, por seren insuficientes os membros asistentes, quedará convocada automaticamente para unha hora máis tarde, no mesmo lugar coa mesma orde do día, bastando a asistencia dun tercio dos seus membros e, en todo caso, do presidente e do secretario ou persoas que os substitúan.

### **Artigo 10º.-Sesións do comité.**

**1.** As sesións do comité celebraranse na cidade de Santiago de Compostela, se ben con carácter excepcional poderán celebrarse noutras cidades da Unión Europea.

**2.** Celebrarase unha sesión ordinaria cada trimestre e en cada unha delas fixarase a data da seguinte. As sesións extraordinarias convocaranse por orde do presidente en casos de urxencia ou necesidade.

### **Artigo 11º.-Convocatorias das reunións.**

As convocatorias das reunións efectuaranse sempre por escrito e cunha antelación de quince días naturais para as sesións ordinarias e de cinco días para as sesións extraordinarias. As convocatorias especificarán o día, hora e lugar de celebración da reunión así como a orde do día e irán acompañadas da documentación necesaria para o seu estudio polos membros do comité.

### **Artigo 12º.-Asuntos fóra da orde do día.**

Non poderá ser obxecto de debate ningún tema que non figure na orde do día, agás que por razóns de urxencia e estando presentes tódolos membros do comité, emitan o seu voto favorable por maioría.

### **Artigo 13º.-Adopción dos acordos.**

Os acordos serán adoptados por maioría simple.

#### **Artigo 14º.-Acta das sesións.**

De cada sesión que se celebre levantará acta o secretario, especificando os asistentes á reunión a orde do día, circunstancias de lugar e tempo nas que se celebraron, puntos principais da deliberación e contido dos acordos.

Tamén figurarán as solicitudes dos membros do comité, os votos contrarios, as abstencións e os votos favorables.

Os membros que discrepen do acordo adoptado poderán formular voto particular por escrito no prazo de 48 horas, que se incorporará ó texto aprobado.

A acta levantada polo secretario será sometida para a súa aprobación na mesma ou na seguinte reunión do comité.

#### **Artigo 15º.-Certificacións dos acordos.**

Os que acrediten a titularidade dun interese lexítimo poderán dirixirse ó secretario para que lles sexa expedida certificación dos acordos.

#### **Artigo 16º.-Comisións de traballo.**

Co fin de axiliza-lo traballo do comité e para aproveitar ó máximo o principio de especialidade, estableceranse unhas comisións de traballo compostas, polo menos, por tres membros. Poderán incorporarse a elas outros especialistas que, sen seren membros do comité, pola súa calidade profesional se consideren necesarios para a consecución dos obxectivos das comisións. Estes especialistas terán o carácter de invitados á comisión.

As comisións de traballo que se crearán son as seguintes:

- a)** Comisión de exposicións.
- b)** Comisión de publicacións.
- c)** Comisión de peregrinaxe actual e camiños.
- d)** Comisión de audiovisuais.

\* O comité, sempre por unanimidade e en razón das súas necesidades, poderá crear calquera outra.

#### **Artigo 17º.-Comisión executiva.**

Créase unha comisión executiva para atende-la tramitación de asuntos en casos de urxencia ou necesidade que estará composta polo presidente, o secretario e dous vocais sinalados polo comité.

## **Capítulo II. Xerencia de Promoción do Camiño de Santiago.**

### **Artigo 18º.-Funcións.**

A Xerencia de Promoción do Camiño de Santiago é o órgano administrativo ó que lle corresponden, directamente ou a través da Sociedade Anónima de Xestión do Plan Xacobeo, a dirección e coordinación das actuacións da consellería competente na materia en todas aquelas cuestións relativas ó Camiño de Santiago e, especialmente, exercerá as seguintes funcións:

- a)** A conservación e posta en valor do Camiño de Santiago en Galicia.
- b)** A promoción do Camiño de Santiago, incluídas as actividades de animación.
- c)** A xestión da imaxe corporativa do Xacobeo que redunde na promoción do Camiño de Santiago, así como a elaboración e publicación de estatísticas, sen prexuízo das competencias do Instituto Galego de Estatística sobre o Camiño de Santiago e todo aquilo que redunde na promoción do Camiño de Santiago.
- d)** A coordinación da rede de albergues e o complexo do Monte do Gozo.
- e)** As relacións do Camiño de Santiago cos concellos de Galicia, coas comunidades autónomas do Camiño de Santiago e os seus concellos, coa Administración central e demais institucións públicas e privadas, particularmente con institucións relixiosas e asociacións de amigos do Camiño de Santiago.
- f)** A promoción da artesanía e o deseño relacionados co Camiño de Santiago, así como outras actividades que signifiquen a súa vinculación co Camiño de Santiago e sexan parte complementaria del.
- g)** A divulgación científica do Camiño de Santiago a través de publicacións, congresos, seminarios, exposicións e outros.
- h)** A programación da participación da Comunidade Autónoma nas exposicións universais.

### **Artigo 19º.-Estructura da Xerencia de Promoción do Camiño de Santiago.**

Para o desenvolvemento das súas funcións, a Xerencia de Promoción do Camiño de Santiago estrutúrase da seguinte forma:

- O xerente de Promoción do Camiño de Santiago con rango de subdirector xeral.
- O servizo de promoción do Camiño de Santiago, ó que lle corresponden as seguintes **funcións**:
  - a)** Actividades de delimitación física dos camiños, así como a súa sinalización e información.
  - b)** Recuperación e rehabilitación do trazado físico dos camiños e dotación dos albergues.
  - c)** Accións de dinamización referidas á poboación local dos camiños, incluídas as actividades de animación.

**d)** Organización de actos culturais de tema xacobeo e elaboración e edición de material informativo e promocional.

**e)** Accións de promoción e cooperación en relación co tema xacobeo e os camiños de Santiago.

### **Capítulo III. Sociedade Anónima de Xestión do Plan Xacobeo.**

#### **Artigo 20º.-Natureza e obxecto.**

A empresa S.A. de Xestión do Plan Xacobeo ten forma de sociedade anónima, capital integramente público e está a cargo da Xunta de Galicia.

Constitúen o obxecto da sociedade as actividades relacionadas co Xacobeo que se relacionan nos seus estatutos, entre outras:

- a)** A conservación, rehabilitación e recuperación do Camiño.
- b)** A organización dos premios Xacobeo.
- c)** Contratación, divulgación, promoción e difusión de representacións teatrais.
- d)** Contratación, divulgación, promoción e difusión de concertos musicais.
- e)** A promoción da artesanía e o deseño relacionados co Camiño de Santiago.
- f)** Centro servidor de datos de Galicia.
- g)** Construcción, mantemento, reparación e xestión da rede de albergues.
- h)** Os convenios con concellos e institucións relixiosas.
- i)** A produción cinematográfica e audiovisual.
- j)** Actos de patrocinio.

\* As actividades integrantes do obxecto social poderán ser realizadas pola sociedade, xa directamente xa indirectamente, mediante a titularidade de accións ou participacións de sociedades de obxecto idéntico ou análogo, ou mediante calquera outra forma admitida en dereito.

## **Capítulo IV. Rexistro de Entidades de Promoción do Camiño de Santiago**

### **Artigo 21º.-Obxecto.**

O Rexistro de Entidades de Promoción do Camiño de Santiago dependente da consellería que teña atribuídas as competencias no relativo ó Camiño de Santiago, ten a finalidade de levar a cabo actuacións conxuntas, facilitar información recíproca e calquera outra forma de colaboración no concernente ó Camiño.

### **Artigo 22º.-Adscrición funcional e orgánica.**

O rexistro adscríbese á Xerencia de Promoción do Camiño de Santiago á que deberán dirixirse as solicitudes de inscrición nel.

### **Artigo 23º.-Requisitos das entidades.**

Para a súa inscrición no rexistro, as entidades solicitantes deberán ter como finalidade, expresamente reflectida nos seus estatutos, a recuperación, conservación e promoción do Camiño de Santiago, así como a difusión da cultura derivada deste.

### **Artigo 24º.-Voluntariedade da inscrición.**

A inscrición no rexistro é, pola súa finalidade, voluntaria, mais será condición indispensable para poder recibir as subvencións que regulamentariamente se determinen e para o outorgamento de convenios coa consellería competente en materia do Camiño de Santiago.

### **Artigo 25º.-Libros do rexistro.**

No rexistro levaranse os seguintes libros e instrumentos:

- a)** Libro diario de presentación de documentos.
- b)** Libro rexistro de inscrición das entidades.
- c)** Índice alfabético das entidades, no que se indicará o folio rexistral onde consten inscritas.
- d)** Arquivo no que se conservará un exemplar de tódolos documentos que se presenten.
- e)** Calquera outro que se coide necesario para o bo funcionamento do rexistro.

## **Artigo 26º.-Documentación para a inscrición.**

**1.** A solicitude de inscrición no rexistro farase en escrito formulado conforme o modelo que figura no anexo I do presente decreto e deberá ir acompañada da seguinte documentación:

- a)** Denominación e domicilio da entidade co número de teléfono e fax de contacto.
- b)** Escritura de constitución e estatutos nos que deberá acreditarse a finalidade descrita no artigo 23º.
- c)** Réxime económico e financiamento.
- d)** Certificado de inscrición no rexistro ou rexistros correspondentes nacionais ou internacionais. No caso de que a entidade solicitante sexa estranxeira, deberá acreditar-la súa inscrición ou visado polo fedatario ou organismo competente no seu Estado.
- e)** Composición do órgano de dirección, con expresión individualizada dos seus membros indicando nome, cargo, DNI, domicilio e teléfono e fax de contacto.
- f)** Documento acreditativo do CIF ou equivalente no estranxeiro.
- g)** Memoria xustificativa das actividades desenvolvidas nos últimos anos e proxecto de actividades inminentes no futuro.

**2.** O encargado do rexistro poderá reclamar dos solicitantes cantos datos e antecedentes coidase necesario para xulgar sobre a procedencia da devandita inscrición.

**3.** No caso de que as entidades solicitantes figuren inscritas en calquera outro rexistro de ámbito nacional ou internacional, deberán indicar este extremo ó presenta-la solicitude de inscrición.

## **Artigo 27º.-Inscrición.**

**1.** Presentada a solicitude de inscrición, anotarase a súa presentación no libro diario e o encargado do rexistro procederá, no prazo de cinco días, a examina-la documentación presentada para comprobar se se cumpren os requisitos esixidos polo presente decreto e as disposicións que o desenvolvan.

**2.** No caso de que a documentación que se presente coa solicitude de inscrición sexa correcta, efectuarase a inscrición no libro rexistro, expedindo unha certificación acreditativa de tal extremo na que conste a data dela e o número de rexistro asignado no prazo de trinta días.

**3.** De observarse defectos na documentación, daráselle un prazo de trinta días para que se emenden os defectos observados. Transcorrido o dito prazo sen seren corrixidos, a solicitude de inscrición será denegada.

#### **Artigo 28º.-Cancelación.**

**1.** Procederá a cancelación da inscrición no rexistro cando a entidade deixe de cumprir os requisitos esixidos polo presente decreto e as disposicións que o desenvolvan e, en todo caso, cando se extinga a súa personalidade xurídica ou se disolva a entidade.

**2.** A cancelación poderase acordar de oficio ou por instancia de parte interesada por resolución do órgano encargado do rexistro logo da instrución do oportuno expediente no que será oído, en todo caso, o representante legal da entidade, de non ser este quen solicite a cancelación.

#### **Artigo 29º.-Natureza do rexistro.**

**1.** O rexistro é público. A publicidade do seu contido farase mediante manifestación dos seus libros e documentos que constan no arquivo ou mediante certificación expedida polo seu encargado.

**2.** O solicitante de datos que consten no rexistro deberá acreditar por escrito a súa personalidade e o seu interese especificando os extremos que pretende examinar ou dos que se solicite certificación.

**3.** Os datos que consten no rexistro poderanse utilizar con fins estatísticos.

### **Capítulo V. Procedemento de declaración de interese para a promoción do Camiño de Santiago**

#### **Artigo 30º.-Obxecto.**

Poderán ser declaradas de interese todas aquelas actividades e proxectos que contribúan á promoción do Camiño de Santiago.

#### **Artigo 31º.-Requisitos.**

A declaración outorgarase logo de petición dos seus titulares, xa sexan persoas físicas ou xurídicas, sempre que cumpran os seguintes requisitos:

**a)** As actividades ou proxectos presentados deberán contribuír directa ou indirectamente á promoción do Camiño de Santiago por calquera medio que deixe constancia da súa importancia, difusión ou coñecemento.

**b)** Tales actividades poderán ser desenvolvidas non só en Galicia, senón en calquera localidade pola que atravesese o camiño, na medida en que reflicten a importancia e consideración do camiño en Galicia como punto final deste itinerario cultural.

**c)** As actividades deberán ser lícitas e de interese para o camiño.

**d)** Compromiso expreso dos titulares de facer constar en lugar visible que as súas actividades ou proxectos foron declarados de interese pola consellería competente no Camiño de Santiago.

### **Artigo 32º.-Inscripción no rexistro.**

**1.** O rexistro no que se inscribirán tódalas actividades e proxectos declarados de interese para a promoción do camiño depende da consellería que teña atribuídas as competencias no referente ó Camiño de Santiago. O rexistro estará adscrito á Xerencia de Promoción do Camiño de Santiago.

**2.** A solicitude de inscrición no rexistro farase mediante escrito dirixido á Xerencia de Promoción do Camiño de Santiago e poderá ser presentada en calquera dos centros previstos no artigo 38 da Lei 30/1992, do 26 de novembro, de acordo coas condicións establecidas no dito artigo.

\* A instancia deberá ir acompañada da seguinte **documentación**:

**a)** Nome, apelidos ou razón social do solicitante.

**b)** Enderezo da persoa física ou entidade.

**c)** Copia do DNI ou CIF.

**d)** Copia dos estatutos no caso de que o solicitante sexa unha entidade.

**e)** Memoria explicativa dos proxectos ou actividades que se vaian realizar.

**f)** Copia do proxecto presentado xuntando fotografías, maquetas, libros, xoguetes, etc..., para os efectos de ser analizado pola comisión encargada da súa valoración.

**g)** Declaración xurada do solicitante comprometéndose a facer constar en lugar visible que as súas actividades ou proxectos foron declarados de interese pola

consellería competente no Camiño de Santiago, de se-lo caso.

**h)** Calquera outro documento que se considere necesario e así se lle notifique ós interesados.

**3.** A inscrición no rexistro é condición indispensable para poder obter os beneficios sinalados no artigo 34º deste decreto.

### **Artigo 33º.-Valoración dos proxectos.**

Unha comisión creada para o efecto valorará os proxectos presentados e elevará a súa proposta motivada ó conselleiro, o cal resolverá. A comisión terá en conta os seguintes **criterios**:

- \* Que concorran os requisitos sinalados nos artigos anteriores.
- \* O interese da actividade que se vai realizar.
- \* A orixinalidade do proxecto presentado.
- \* Calquera outra que contribúa á promoción do camiño.

- A resolución farase por orde da consellería competente na materia, que se publicará no Diario Oficial de Galicia.

### **Artigo 34º.-Beneficios da declaración de interese.**

A declaración de interese de tódalas actividades ou proxectos que contribúan á promoción do Camiño de Santiago comportará para os seus titulares os seguintes **beneficios**:

**a)** Gozar do recoñecemento e consideración que lle vén dado por facer constar en tales actividades e proxectos que foron declarados de interese pola consellería competente no Camiño de Santiago.

**b)** Poder ser beneficiario das subvencións que anualmente se convoquen para todos aqueles proxectos ou actividades que fosen declarados de interese para a promoción do Camiño de Santiago pola consellería competente ó respecto.

**c)** Ser incluído nas guías, catálogos e demais publicacións sobre o Camiño de Santiago que difunda a consellería.

**d)** Recibir orientación técnica e gratuíta dos servizos competentes da Xerencia de Promoción do Camiño de Santiago para o desenvolvemento da súa actividade.